

Allannguutissatut siunnersuut

**Siunnersuut: Meeqqanik inuusuttunillu ikiorsiisarneq pillugu Inatsisartut peqqussutaannik allanngortitsineq pillugu Inatsisartut peqqussutaat lnr. xx, xx 2008-meersoq**

Aappassaaneerneqarnissaanut saqqummiussaq Naalakkersuisunit.

§ 1-imut

**1. § 1** imatut oqaasertalerneqassaaq:

"Meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq, kingullermik inatsisartut peqqussutaatigut nr. 9, 20. november 2006-imeersukkut allanngortinneqartukkut makkuninnga allannguuteqartinneqarpoq.

**01. § 23 imm. 1**, imatut oqaaseqartalerneqassaaq:

"Ulloq unnuarlu paaqqinniffiit pilersinneqarnissaannut, pisatsersornissaannut, siulersorneqarnissaannut ingerlanneqarnissaannullu aammalu paaqqinniffinni perorsaanermik suliaqarnermut aamma nakuuserneq pillugu malittarisassanik Naalakkersuisut aalajangersaassapput."

**02. § 26-ip** kingornatigut immikkoortutut nutaatut ikkunneqassaaq:

*"Meeqqanut  
inuusuttunullu ulloq  
unnuarlu paaqqinniffinni  
immikkoortortat  
isumannaallisakkat"*

**§ 01.** Naalakkersuisut meeqqanut inuusuttunullu ulloq unnuarlu paaqqinniffinni immikkoortortanik isumannaallisakkanik pilersitsisinnaapput, tamanna pisariaqartinneqarpat.

*Imm.2.* Meeqqanut inuusuttunullu ulloq unnuarlu paaqqinniffinni immikkoortortaq isumannaallisagaq tassaavoq, immikkoortortaq akuerineqarluni matunik silarlernik igalaanillu parnaarsimajuartitsiviusartog.

*Imm.3.* Naalakkersuisut meeqqanut inuusuttunullu ulloq unnuarlu paaqqinniffinni immikkoortortani isumannaallisakkani naammattunik inissaqartitsinissaq nakkutigissavaat.

*Imm. 4.* Naalakkersuisut meeqqanut inuusuttunullu ulloq unnuarlu paaqqinniffinni immikkoortortanut isumannaallisakkanut sukumiinerusunik maleruagassiussapput.

§ 02. Meeqqat inuusuttullu politiinit tigummigallagaasut eqqartuunneqarsimasulluunniit meeqqanut inuusuttunullu ulloq unnuarlu paaqqinnittarfinni immikkoortortanut isumannaallisakkanut inissinneqarsinnaapput. Aalajangersagaq aamma atorneqassaaq meeqqat 12-nik – 15-nillu akornanni ukiulinnut, sakkortuumik pinerluuteqarsimasunut, aamma meeraq eqqarsaatigalugu inissinneqarnissaa piumasarineqavippat.

*Imm. 2.* Meeqqanut inuusuttunullu ulloq unnuarlu paaqqinnittarfimmi immikkoortortanut isumannaallisakkanut inissiineq, ulloq unnuarlu paaqqinnittarfiup tulleriissaarisartuanit akuerineqassaaq."

2. § 2 oqaasertaliorneqassaaq ima:

"§ 2. Inatsisartut peqqussutaat atortuulissaaq 1. januar 2009."

Oqaaseqaatinut tunngatillugu siunnersuutit

### **Nalinginnaasumik oqaaseqaatit**

Allannguutissatut siunnersuummi matumani pineqarput meeqqanut inuusuttunullu ulloq unnuarlu paaqqinniffinni immikkoortortanut isumannaallisakkanut maleruagassaliortarneq. Immikkoortortat isumannaallisakkat taamaallaat illusimmaviussapput meeqqanut inuusuttunullu pinerluttulerinermi inatsimmik unioqqutitsisunut unioqqutitsiniartunulluunniit, pineqaatissinneqarnissaminnut ukiukippallaartunut. Allannguutissatut siunnersuutip tunngaviusumik siunertaraa meeqqanut inuusuttunullu ulloq unnuarlu paaqqinniffinni immikkoortortanik isumannaallisakkanik pilersitsisinnaasarnissaaq, taamaasillunilu Danmarkimi inissiisarnermut imaluunniit inersimasut pinerluuteqarsimasut peqatigisussangorlugit inissiisarnermut taarsiullugu allamik periarfissaqalernissaaq.

Meeqqat inuusuttullu taamaattut ima piumasaqarfiusartigaat meeqqanut inuusuttunullu ulloq unnuarlu paaqqinniffinni nalinginnaasuni paaqqutarineqarsinnaanatik. Pisariaqarpoq pineqartut immikkut aqqissugaasuni pisariaqartitaannik ajornartorsiutaannillu isumaginniffiusinnaasuni inissiisarfinniitsinnissaaq.

Allannguutissatut siunnersuummi aamma meeqqanut inuusuttunullu ulloq unnuarlu paaqqinnittarfinnik suugaluartunilluunniit akuersissuteqartarnermut, aammalu meeqqanut inuusuttunullu ulloq unnuarlu paaqqinniffinni pissaanermik atuineq pillugu malittarisassanut inatsisitigut tunngavissatut aalajangersakkat erseqqissarneqarput.

Aalajangersimalluinnartumik paragraffimik ilanngussisoqarpoq, tassanilu pineqartutuaallutik immikkoortortat isumannaallisakkat. Aalajangersakkamut

peqatigitillugu, meeqqanut inuusuttunullu ulloq unnuarlu paaqqinniffinni immikkoortortat isumannaallisakkat pillugit Naalackersuisut sukumiinerusumik maleruagassiorsinnaalerput.

Siunnersuummut sanilliullugu maleruagassanik erseqqissaallunilu itisilerineq pivoq allanguutissatut siunnersuutip Inatsisartut ukiakkut ataatsimiinneranni siullermeerneqarluni oqaluuserineqarneranut atatillugu. Taamatuttaaq allanguutissatut siunnersuummut ilanngunneqarput Inatsisartut Ilaqutariinnermut Ataatsimiititaliaani tamatuma kingornatigut oqallisaasimasut.

Taamatuttaaq malugineqassaaq meeqqanut inuusuttunullu ulloq unnuarlu paaqqinniffinnik nakkutilliineq Naalackersuisut isumagisussaammasuk, tak. Isumaginninnermut tunngasunik nakkutilliineq pillugu Namminersornerullutik Oqartussat nalunaarutaanni nr. 6-imi, 16. februar 2006-imeersumi § 6. Naalackersuisut nakkutilliinerat sukanganerussiaaq, tamatumani immikkut akuliuttarnermut tunngassutilik pineqarmat.

## **Aalajangersakkanut ataasiakkaanut oqaaseqaatit**

### **Nr. 1-imut**

§ 23, imm. 1-mut

Aalajangersakkakkut meeqqanut inuusuttunullu ulloq unnuarlu paaqqinniffinni pissaanermik atuneq pillugu inatsisitigut tunngavissaareersut erseqqissarneqarput, taamaasilluni inatsisitigut tunngavissaq paasinarlunilu erseqqippoq. Pissaanermik atuneq ilungersunaqimmat immikkullu akuliunnermut tunngassuteqarmat pingaaruteqarlunnarpoq inatsisitigut tunngavissat qularutigineqannginnissaat. Aammattaaq innersuussutigineqarpoq Meeqqanut inuusuttunullu kiisalu annertuumik innarluutilinnut ulloq unnuarlu paaqqinniffiit pillugit Namminersornerullutik Oqartussat nalunaarutaat nr. 64, 29. december 1994-imeersaq.

§ 01-mut

Immikkoortortat isumannaallisakkat pilersinneqarnissaat pillugu aalajangersagaq ilanngunneqarpoq. Meeqqanut inuusuttunullu ulloq unnuarlu paaqqinniffinni immikkoortortanik isumannaallisakkanik pilersitsisinaanissaq annertuumik pisariaqartinneqarpoq, ullumikkut inuusuttut isumaginninnermi perorsaanikkut neqeroorfigineqarsinnaasannngitsut amerliartormata. Siusinnerusukkut meeqqat inuusuttullu pineqartut Danmarkiliartinneqartariaqartarsimapput imaluunniit inersimasut pinerluuteqarsimasut peqatigisussanngorlugit inissinneqartariaqartarsimallutik, Kalaallit Nunaanni naleqquttunik inissiisarfeqannginnera pissutigalugu.

Imm. 1-imut.

Aalajangersakkakut meeqqanut inuusuttunullu ulloq unnuarlu paaqqinniffini immikkoortortanik isumannaallisakkanik Naalakkersuisut pilersitsisinnaalerput.

Immikkoortortaq isumannaallisagaq inuusuttumut pinerluuteqarsimasumut allamik periarfissiivoq assersuutigalugu inersimasut pinerlussimasut akornanni inissiisarfinmiitinneqarnissamit, taamatullu inuusuttumut meeqqanut inuusuttunullu ulloq unnuarlu nalinginnaasumik paaqqinniffinni paaqqutarineqarsinnaanngikkaluamut isumaginninnermi perorsaanikkut neqeroorutaassalluni. Taamatut pisoqartillugu periarfissaq alla tassaasinnaavoq neqerooruteqarsinnaannginneq imaluunniit Danmarkimi inissiineq.

Pingaaruteqarpoq erseqqissassallugu, immikkoortortamut isumannaallisakkamut inissiineq meeqqamut/inuusuttumut 18-it inorlugit ukiulimmut isumaginninnermi perorsaanikkut neqeroorutaasinnaammat aamma Pinerluttulerinnermut inatsit malillugu pineqaatissiisutaasinnaalluni. Meeqqamut inuusuttumulluunniit iliuusissanut pilersaarusiortoqassaaq, taamatuttaarlu pineqartup siunissanut inuttullu ineriartornissamut anguniakkat aqqqissuunneqassapput. Meeqqanik inuusuttunilluunniit toqqorsiviunngilaq qanoq iliorfigeriassallugit nalulikkanik inissiisarfik, tassaallunili meeqqat inuusuttullu tikillugit suliaqarfusoq, isumaginninnermi perorsaanerit aqutigalugit inuunerannik ingerlariaqqiffissanut ikiorsiivik. Meeqqamik/inuusuttumik isumaginninneq pitsaasumik piginnaasaqarfusumillu ingerlanneqassaaq siusinaartumik piginnaassuseqartumillu iliuuseqarnikkut.

Imm. 2-mut.

Immikkoortortat isumannaallisakkat paasineqassapput meeqqanut inuusuttunullu ulloq unnuarlu paaqqiffinni immikkoortortat minnerit imaluunniit illutaanit allamiittut, matui igaavilu paarnaaraqqatinneqartut, taamaasilluni meeraq inuusuttorluunniit qimagutiinnarsinnaanngilaq.

Immikkoortortami isumannaallisakkami igalaat sequmittussaannngitsutut sanaajusarput, sulisut saassunneqassagunik kalerrisaaruteqartinneqartarput, ulloq unnuarlu tamaat nal. akunnerini 24-ni pigaartoqartarpoq sulisoqarlunilu. Immikkoortortap immikkoortuisa ilai parnaarneqarsinnaapput, pinerluttunillu isumaginnittoqarfik politiillu qanilluinnartumik suleqatigineqarlutik.

Imm. 3-mut.

Meeqqanut inuusuttunullu ulloq unnuarlu isumannaallisakkamik paaqqinniffinni inissat naammattut pigineqarnissaat Naalakkersuisut isumagisassaraat. Naalakkersuisut taakkuupput meeqqanut inuusuttunullu inissanik isumannaallisakkanik pisariaqartitsinermik nalilersuisartussat tamannalu tunngavigalugu iliuuseqartartussat. Immikkoortortat isumannaallisakkat pilersinneqarnissaannut Naalakkersuisut aningaasatigut pisussaaffeqarput.

Peqatigitillugu meeqqap imaluunniit inuusuttup kommuniani kommunalbestyrelsi, najugaqarnermut akiliisussaavoq.

Imm. 4-mut

Imm. 4 tassaavoq, aalajangersagaq meeqqanut inuusuttunullu paaqqinnittarfinni immikkoortortanut isumannaallisakkanut Naalakkersuisut sukumiinerusunik malittarissasaliorsinnaanerannut, inatsisitigut tunngavissiisoq. Assersuutigalugu sulisut amerlassusissaannut malittarisassat, ilinniartitaanermut aamma sunngiffimmi sammisassaqartitsinermut neqerooruteqarnermi piumasagaatit, init aaqqissuunnerannut il.il.

§ 02-mut

Uani aalajangersarneqarpoq, kikkut ulloq unnuarlu meeqqanut inuusuttunullu paaqqinniffinni immikkoortortani isumannaallisakkani inissinneqarsinnaanersut. Peqatigitillugu erseqqissarneqarpoq meeqqat inuusuttullu pinerluuteqarsimasut kisimik pineqartut.

Imm. 1-imut

Ulloq unnuarlu meeqqat inuusuttullu paaqqinniffinni immikkoortortani isumannaallisakkani meeqqat inuusuttullu inatsisinik unioqutitsisimasut kisimik inissinneqarsinnaaput, imaluunniit tassaasinnaaput 15-nik ukioqalereersimasut. 15-inik ukioqalersimaneq pineqaatissinneqarnissamut ukiukinnerpaaffiummat, meeqqat 15-inik inorlugit ukiullit Pinerluttulerinermik inatsit malillugu pineqaatissinneqarsinnaanngillat, pinerluutigineqartoq inatsimmi taaneqaraluarpalluunniit.

Tassa immikkoortortat isumannaallisakkat taamaallaat meeqqanut inuusuttunullu pinerluuteqarsimasunut naatsorsuussaapput.

Tassunga atatillugu taaneqassaaq meeqqat inuusuttullu ikittuinnaat kisimik eqqartuussivimmit inissiisarfimmi inissinneqarnissamut pineqaatissinneqartarmata, tamatumani tamanna annertuumik akulerunnerummat pineqartunut pineqaatissiinerusarmat aammalu aatsaat inoqammut ulorianartumik pinerluuteqarnermi pineqaatissiisoqartillugu atorneqarsinnaaasarluni. Meeqqat inuusuttullu amerlanerpaartaat inissinneqartussanngorlugit eqqartuunneqartarput, meeqqanut inuusuttunullu isumaginnittoqarfimmik taaneqartartumut, tassaasoq eqqartuussut piumasagaatitaqanngitsoq imaluunniit eqqartuussut piumasagaatitalik meeqqap inuusuttulluunniit kommunalbestyrelsimit isumagineqartussanngornera pillugu inissinneqarnissaanik piumasagaatitalik.

Meeqqat inuusuttullu eqqartuussivimmi eqqartuussisoqareertillugu Pinerluttunik isumaginnittoqarfimmut isumagisassanngortinneqartarput imaluunniit kommunimut najugaqarfimminnut isumagisassanngortinneqartarlutik. Pinerluttunik isumaginnittoqarfik meeqqanut inuusuttunullu inissiisarfinnut

inissinneqartussanngorlugit eqqartuunneqartunut akisussaasuvoq, meeqqallu inuusuttulluunniit paaqqinnittarfimmut inissinneqarfigisariaqagaanut inassuteqaateqassalluni.

Meeqqat inuusuttullu meeqqanut inuusuttunullu isumaginnittoqarfimmut isumagisassanngorlugit eqqartuunneqartunut pineqaatissinneqarnissaminnullu ukiukippallaartunut kommuni akisussaasuvoq. Kommunalbestyrelsip isummerfigissavaa meeqqanut inuusuttunullu pineqartunut aaqqineq sorleq naleqquttuunersoq. Ilaatigut tassaasinnaalluni ulloq unnuarlu paaqqinniffinnut inissiineq.

Meeraq inuusuttorluunniit ulloq unnuarlu paaqqinniffimmi immikkoortortami isumannaallisakkami tigummigallagassanngortinneqarpat Eqqartuussisoqarneq pillugu inatsimmi kapitali 5-imi tigummigallagassanngortitsisarneq pillugu malittarisassat atuutissapput, takuuk Eqqartuussisoqarneq pillugu inatsit.

Imm. 2-mut

Kommunalbestyrelsip, Pinerluttunik isumaginnittoqarfiup politiilluunniit kissaatigippassuk, meeqqap inuusuttulluunniit meeqqanut inuusuttunullu ulloq unnuarlu paaqqinnittarfimmi immikkoortortamut isumannaallisakkamut meeqqap inissinneqarnissaa, kommunalbestyrelsip paaqqinnittarfiup pineqartup tulleriiarisartuinut inissiinissaq tamanna akuerisassanngorlugu inassutigissavaa. Tulleriiarisartut akuersineratigut qulakkerneqassaaq, meeqqat sualuttumik pinerluuteqarsimasut kisimik immikkoortortanilu isumannaallisakkani sullinniakkat immikkoortortanut isumannaallisakkanut inissinneqarnissaat.

## **Nr. 2-mut**

Siunnersuutigineqarpoq Inatsisartut peqqussutaat atortuulersinneqassasoq 1. januar 2009